

REGLUR

um sumardvalarheimili barna og sumarbúðir.

1. gr.

Skilgreining. Stofnun - rekstur.

Sumardvalarheimili telst hvert það heimili, sem tekur 6 börn eða fleiri til sumardvalar, gegn gjaldi. Börn starfsfólks heimilisins 12 ára og yngri, sem þar búa, teljast með sumardvalar börnum.

Félagsmálaráðuneytið veitir leyfi til að stofna eða reka sumardvalarheimili að uppfylltum þeim skilyrðum er í þessum reglum greinir. Óheimilt er að hefja starfrækslu þessa fyrr en ráðuneytið hefur gefið út leyfisbréf, sbr. 2. mgr. 4. gr.

Sama gildir um stofnun og rekstur sumarbúða, að því leyti sem við á, en aðalmunur á þeim og sumardvalarheimilum er sá, að sumarbúðir eru að öðru jöfnu ætlaðar fyrir fleiri börn, er dvelja í skamman tíma, t.d. 1 - 2 vikur í senn, og þar er börnum oftlega skipt í flokka.

2. gr.

Umsóknir.

Umsóknir um leyfi til að stofna eða reka sumardvalarheimili/sumarbúðir skulu sendar félagsmálaráðuneytinu á þar til gerðu eyðublaði fyrir 1. maí ár hvert.

Í umsókn skal greina:

1. Nafn ábyrgðarmanns, kennitölu, menntun, núverandi starf, heimilisfang, heima- og vinnusíma.
2. Nafn forstöðumanns ef hann er annar en ábyrgðarmaður. Sömu upplýsingar skulu koma fram um forstöðumann og taldar eru í 1. tölu.
3. Um hvað er sótt, stofnun/rekstur sumardvalarheimilis/sumarbúða, heiti þess/þeirra og staðsetningu.
4. Fjölda starfsfólks, verkaskiptingu þeirra ef um það er að ræða, s.s. umönnun barna, hreingerningar, matseld o.s.frv.
5. Tímabil sem sumardvalarheimili/sumarbúðir munu starfa.
6. Aldur dvalarbarna, fjöldi þeirra og dvalartíma í senn.
7. Lýsingu á markmiðum, uppeldisstarfi og viðfangsefnum, sem börnum eru ætluð, meðan á dvöl þeirra stendur.

3. gr.

Umsagnir og vottorð.

Umsókn skal fylgja:

1. Almennar upplýsingar um starfsferil ábyrgðarmanns/forstöðumanns, menntun hans og reynslu af starfi með börnum.
2. Sakavottorð ábyrgðarmanns/forstöðumanns.
3. Umsögn héraðslæknis/heilbrigðisfulltrúa, þar sem fram komi:
 - a) Lýsing á húsnæði og mat lagt á ástand þess, s.s. upphitun, snyrtiaðstöðu, almennt hreinlæti, húsrými, m.a. til innileikja, þegar veður hamlar útivist, og annað í því sambandi, sem að dómi þeirra skiptir máli,
 - b) mat á hver sé hæfilegur fjöldi barna í húsnæðinu miðað við gildandi reglur,
 - c) hvort nokkur sérstök slysaætta sé í nærliggjandi umhverfi,
 - d) hvort önnur starfsemi fari fram á staðnum.
4. Vottorð slökkviliðsstjóra í viðkomandi sveitarfélagi um að brunavarnir í húsnæði séu í lagi.

4. gr.

Leyfisveiting.

Pegar ráðuneytinu hefur borist umsókn, sbr. 1. mgr. 2. gr., skal það senda hana til umsagnar barnaverndarnefndar þar sem sumardvalarheimilið/sumarbúðirnar verða starfrættar, ef hún á ekki hlut að rekstrinum.

Að fenginni umsögn barnaverndarnefndar gefur ráðuneytið út tímabundið leyfisbréf uppfylli umsókn skilyrði reglna þessara að mati ráðuneytisins.

Að jafnaði skulu leyfisbréf gefin út til eins árs. Hafi ráðuneytið veitt rekstrarleyfi til lengri tíma en eins árs, skulu umsækjendur, áður en starfsemi hefst að nýju, gera ráðuneytinu grein fyrir öllum breytingum á starfseminni á milli ára, svo sem varðandi fjölda barna eða starfsmanna, starfsmannahaldi, húsnæði o.s.frv. Þá getur ráðuneytið óskað eftir endurnýjun vottorða eða umsagna, ef ástæða þykir til.

5. gr.

Húsnæði.

Húsnæði skal fullnægja eftirfarandi lágmarksskilyrðum:

- a) Að jafnaði skulu ekki vera fleiri en sex börn í svefnherbergi, nema þar sem sérstakir svefnsalir eru í sumarbúðum,
- b) hvert barn skal sofa í sér rúmi. Börn skulu ekki sofa í svefnpokum ef dvalartími er lengri en hálfur mánuður,
- c) sumardvalarbörn skulu ekki sofa í svefnherbergjum heimilisfólks,
- d) í svefnherbergjum mega ekki vera hlaðrúm nema hæð herbergisins sé 2,50 m eða meira. Aldrei má vera nema eitt háarúm yfir hverju rúmi.
- e) ekki má sofa í borðstofu eða öðrum herbergjum, sem börn eða starfsfólk (heimilisfólk) nota sameiginlega,
- f) eitt vatnssalerni skal að jafnaði vera fyrir hver tíu börn og hæfilegur fjöldi baða miðað við fjölda barna og lengd dvalartíma.

6. gr.

Aldur sumardvalarbarna.

Eigi er heimilt að taka yngri börn en 6 ára til dvalar á sumardvalarheimili eða í sumarbúðir. Þó skal heimilt að taka yngri börn, ef sérstakar aðstæður barns mæla með því, að fengnu samþykki barnaverndarnefndar, enda séu þá gerðar auknar kröfur um fjölda starfsfólks og sérþekkingu þess í meðferð ungra barna.

7. gr.

Heilbrigðisvottorð sumardvalarbarna.

Þeim sumardvalarbörnum sem eiga við einhvers konar veikindi að stríða, skal fylgja læknisvottorð, þar sem fram komi hvers eðlis veikindi barnsins eru og fyrirmæli gefin um meðferð, lyfjagjöf o.s.frv. Skulu þeir sem reka heimilin óska eftir því við forráðamenn barna að slík vottorð séu látin í té þegar við á.

8. gr.

Ábyrgð gagnvart sumardvalarbörnum.

Starfsmenn skulu haga störfum sínum í sem fyllstu samræmi við þarfir dvalarbarna og stuðla að alhliða þroska, heilbrigði og uppeldi hvers og eins. Barnaverndarnefnd í því umdæmi, þar sem heimili er rekið, ber að veita starfsmönnum upplýsingar og leiðbeiningar um þessi efni, ef nauðsyn krefur.

Aldrei má beita dvalarbörn líkamlegum eða andlegum refsingum.

Sumardvalarbörn skulu vera undir eftirliti starfsmanna úti og inni. Forstöðumaður ber ábyrgð á dvalarbörnum frá því heimilið tekur við þeim af foreldrum og þar til þau eru komin í umsjá foreldra sinna að nýju.

Þeim sem annast flutning barna að heimilinu eða frá, skal gert skylt af ábyrgðarmanni heimilisins að sjá svo um að gætt sé fyllsta öryggis við flutninginn og að aðbúnaður barnanna við flutninginn sé sem bestur.

9. gr.

Starfsmannahald.

Í umsjá hvers starfsmanns skulu ekki vera fleiri en sex börn séu þau á aldrinum 6-12 ára. Átta börn mega vera á hvern starfsmann séu þau eldri en 12 ára. Starfsmönnum á aldrinum 15-17 ára skulu ekki ætluð fleiri en fjögur börn í sinni umsjá og þá undir nánu eftirliti fullorðins starfsmanns. Ungmenninn yngri en 15 ára telst ekki til starfsmanna.

Í skipulögðum sumarbúðum teljast þeir til starfsmanna, sem starfa að sérverkefnum, s.s. þvotti, hreingerningum og matseld og eru eldri en 15 ára.

Séu börn á sumardvalarheimili eða í sumarbúðum tuttugu eða fleiri, skulu starfsmenn með uppeldismenntun og/eða reynslu af slíku starfi, einn eða fleiri, eftir ákvörðun félagsmálaráðuneytisins, starfa á heimilinu.

10. gr.

Eftirlit.

Barnaverndarnefnd skal gæta þess að ekki séu rekin í umdæmi hennar önnur sumardvalarheimili eða sumarbúðir en þau sem hafa hlotið leyfi ráðuneytisins.

Barnaverndarnefnd ber að fylgjast vandlega með högum og aðbúnaði barna, sem dvelja á sumardvalarheimili eða í sumarbúðum í umdæmi hennar, og heimsækja það/þær eins oft og þurfa þykir og eigi sjaldnar en tvisvar á sumri hverju.

Forstöðumanni er skylt að afhenda eftirlitsmanni barnaverndarnefndar allar upplýsingar um starfsemi sumardvalarheimilis/sumarbúða, sem óskað er eftir, s.s. skrá yfir starfsmenn. Að heimsókn lokinni skal eftirlitsmaður gefa barnaverndarnefnd umsögn um starfsemina.

Teljji barnaverndarnefnd að meðferð barns/barna á sumardvalarheimili eða í sumarbúðum sé óhæfileg eða rekstri sumardvalarheimilis/sumarbúða á annan hátt ábótavant skal hún leitast við með leiðbeiningum og áminningum að bæta úr því sem áfátt er. Komi það ekki að haldi skal barnaverndarnefnd leggja málið fyrir félagsmálaráðuneytið. Fáí ráðuneytið ekki úr bætt getur það svipt heimilið rétti til áframhaldandi rekstrar.

Ráðuneytið getur krafist barnaverndarnefnd um skýrslu um eftirlit með sumarbúðum og sumardvalarheimilum í umdæmi hennar.

11. gr.

Brot á reglum.

Brot á framanskráðum reglum geta valdið leyfissviptingu.

Ef uppvíst verður um starfrækslu sumardvalarheimilis/sumarbúða án tilskilins leyfisbréfs er barnaverndarnefnd rétt að snúa sér til lögreglu yfirvalda og krefjast lokunar. Þá getur félagsmálaráðuneytið óskað slíkrar lokunar þegar sérstaklega stendur á.

12. gr.

Gildistaka.

Reglur þessar eru settar með skírskotun til laga nr. 58/1992 og öðlast þegar gildi. Jafnframt falla úr gildi reglur nr. 145/1986.

Félagsmálaráðuneytið, 6. apríl 1993.

Jóhanna Sigurðardóttir.

Pórhildur Línal.